

SLUŽBENI LIST
REPUBLIKE BOSNE I HERCEGOVINE



СЛУЖБЕНИ ЛИСТ
РЕПУБЛИКЕ БОСНЕ И ХЕРЦЕГОВИНЕ

Godina III - Broj 12

Nedjelja, 15. maja/svibnja 1994.
SARAJEVO

Za svaki broj posebno se
utvrđuje cijena
Žiro-račun 10100-603-1396

226

Na osnovu člana 8. stav 1. tačka 5. Zakona o izboru odbornika i poslanika u skupštine društveno-političkih zajednica ("Službeni list SRBiH", br. 21/90 i 28/90 i "Službeni list RBiH", br. 12/92 i 22/93) i člana 2. Odluke o primjenjivanju Poslovnika Skupštine Republike Bosne i Hercegovine za vrijeme ratnog stanja ("Službeni list RBiH", broj 20/93), Skupština Republike Bosne i Hercegovine, na zajedničkoj sjednici Skupštine, održanoj 7. februara 1994. godine, donijela je

ODLUKU

**O PRESTANKU MANDATA POJEDINIM
POSLANICIMA SKUPŠTINE REPUBLIKE BOSNE I
HERCEGOVINE**

I

1. Prestaje mandat poslaniku Vijeća građana Skupštine Republike Bosne i Hercegovine PERIĆ NIKOLI, Srbin, Savez reformskih snaga BiH, Gradačac, koji je učestvovao u agresiji protiv Republike Bosne i Hercegovine.

2. Prestaje mandat poslanicima u Vijeću opština Skupštine Republike Bosne i Hercegovine BOBAN MATI, Hrvat, Grude - Hrvatska demokratska zajednica BiH, Grude i SABLJAKOVIĆ HAFEZI, Muslimanka, Cazin, Stranka demokratske akcije BiH, Cazin, koji su učestvovali u agresiji protiv Republike Bosne i Hercegovine.

II

Ova odluka stupa na snagu danom donošenja, a objavit će se u "Službenom listu RBiH".

S broj 176/94
7. februara 1994. godine
Sarajevo

Predsjednik
Skupštine RBiH,
Miro Lazović, s. r.

227

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

**UREDBU SA ZAKONSKOM SNAGOM
O OSNIVANJU AGENCIJE ZA MEĐUNARODNU
SARADNJU U OBNOVI I RAZVOJU REPUBLIKE
BOSNE I HERCEGOVINE**

Član 1.

U cilju osiguranja sredstava, pružanja i podrške u upravljanju i praćenju projekata i usmjeravanju i plasmanu sredsta-

va za obnovu i razvoj Republike Bosne i Hercegovine (u daljem tekstu: Republika) osniva se Agencija za Međunarodnu saradnju u obnovi i razvoju Republike, dioničarsko društvo (d. d.).

Član 2.

Agencija posluje pod nazivom: "Agency for International Cooperation for the Reconstruction and Development of the Republic of Bosnia and Herzegovina" - Shareholdup CO.

Skraćeni naziv Agencije je AICRED (u daljem tekstu: Agencija).

Sjedište Agencije je u Sarajevu, Ulica Omladinska br. 9.

Član 3.

Agencija u pravnom prometu nastupa samostalno, u svoje ime i za svoj račun, u svoje ime i za tuđi račun i tuđe ime i za tuđi račun.

Agencija za svoje obaveze prema trećim licima odgovara svim svojim sredstvima, odnosno imovinom - potpuna odgovornost (p. o.).

Član 4.

Djelatnost Agencije je:

1. Prikupljanje sredstava putem:

- donacija,
- privatnog sektora,
- garantiranja dobijanja kredita,
- kredita na bilateralnoj i multilateralnoj osnovi,
- naknada za izvršene usluge.

2. Pružanje podrške upravljanju projektima i nadzor na realizaciji projekata, i to od usmjeravanja sredstava, saglasnosti Vlade Republike Bosne i Hercegovine (u daljem tekstu: Vlada RBiH) za pojedine projekte do osiguranja tehničke podrške.

3. Usmjeravanje i plasman sredstava.

Član 5.

Osnivač Agencije je Republika, kao i, suosnivači: međunarodne, regionalne, te nacionalne i državne odgovarajuće institucije.

Član 6.

Agencija će poslovati kao dioničarsko društvo u kojem će većina dionica biti u posjedu Republike.

Inicijalni broj dionica iznosi 1.000.

Član 7.

Osnivački kapital Agencije čine sredstva osnivača u iznosu od 1.000.000 US\$ od čega 100.000 US\$ će biti uplaćeno pri registraciji.

Sredstva iz stava 1. ovog člana osigurati će se u Budžetu Republike za 1994. godinu.

Član 8.

Organi upravljanja i rukovođenja u Agenciji su:

- Skupština akcionara,
- Upravni odbor,
- direktor Agencije.

Član 9.

Direktora Agencije imenuje i razrješava Upravni odbor Agencije.

Na prijedlog direktora Upravni odbor Agencije postavlja rukovodeće radnike Agencije.

Član 10.

Statutom Agencije utvrdit će se uvjeti i način izbora i imenovanja, kao i prava i dužnosti direktora.

Do donošenja statuta Agencije, uvjeti i način, prava i dužnosti iz stava 1. ovog člana utvrdit će Upravni odbor, odlukom.

Član 11.

Upravni odbor Agencije ima najmanje tri člana.

Većinu članova Upravnog odbora imenovat će u ime Republike Predsjedništvo RBiH.

Nadležnosti Skupštine i Upravnog odbora Agencije bit će uređene statutom Agencije.

Član 12.

Vlada RBiH daje saglasnost na statut Agencije.

Član 13.

Kontrolu finansijskog poslovanja Agencije vrši član rukovodnog tima koji neposredno odgovara Upravnom odboru.

Član 14.

Vlada RBiH zastupa osnivača u smislu odredaba ove uredbe.

Član 15.

Agencija je obavezna da redovno, a najmanje jedanput šestomjesečno izvještava Vladu RBiH o svom poslovanju.

Član 16.

Agencija će početi sa radom danom upisa u sudski registar.

Član 17.

Agencija će donijeti statut i akt o unutrašnjoj organizaciji u roku od 90 dana od dana stupanja na snagu ove uredbe.

Član 18.

Ova uredba služi kao osnivački akt, na osnovu koje će se izvršiti upis Agencije u sudski registar.

Član 19.

Ova uredba stupa na snagu danom objavljivanja u "Službenom listu RBiH".

PR broj 1649/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

228

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O OSNIVANJU JAVNOG PREDUZEĆA "AIR BOSNIA"

Član 1.

Radi pružanja usluga zračnog saobraćaja za potrebe Republike Bosne i Hercegovine (u daljem tekstu: Republika), osniva se Javno preduzeće "AIR BOSNIA" (u daljem tekstu: Javno preduzeće).

Pružanje usluga iz stava 1. ovog člana od posebnog je društvenog interesa.

Član 2.

Javno preduzeće posluje pod nazivom Javno preduzeće "AIR BOSNIA".

Skraćeni naziv Javnog preduzeća je JP "AIR BOSNIA".

Član 3.

Osnivači Javnog preduzeća su Republika i preduzeće "ENERGO-AIR" u sastavu "ENERGOINVEST-HOLDING" iz Sarajeva.

Osnivački kapital Republike iznosi 51% ukupnog osnivačkog uloga.

Osnivački kapital preduzeća "ENERGO-AIR" iznosi 49% ukupnog osnivačkog uloga.

Član 4.

Sjedište Javnog preduzeća je u Sarajevu.

Član 5.

Javno preduzeće ima svojstvo pravnog lica, sa ograničenom odgovornošću.

Član 6.

Ministarstvo obnove, izgradnje, okolice, saobraćaja i veza, odnosno Direkcija civilne avijacije zastupa osnivača u smislu odredaba ove uredbe.

Član 7.

Radi sigurnosti i urednosti javnog zračnog saobraćaja, javno preduzeće, zavisno od vrste saobraćaja, mora ispunjavati propisane uvjete a naročito u pogledu: odobrenog priručnika o operativnim postupcima obavljanja tog prijevoza, vrste i namjene zrakoplova i zrakoplovnog i ostalog osoblja, osiguranja zrakoplova, raspolaganja odobrenim priručnicima o letačko-operativnim postupcima u skladu sa Zakonom o zračnoj plovidbi ("Službeni list RBiH", broj 2/92) i uvjetima predviđenim međunarodnim ugovorima i drugim aktima kojima se regulira sigurno i uredno vršenje prijevoza u međunarodnom zračnom saobraćaju.

Član 8.

Javno preduzeće dužno je trajno osigurati uvjete za obavljanje poslova i zadataka radi kojih je osnovano.

Član 9.

Osnovna djelatnost Javnog preduzeća je:

- prijevoz putnika i robe u zračnom saobraćaju u unutrašnjem i međunarodnom saobraćaju, na redovnim linijama i čarter letovima,
- prijevoz putnika u gradskom i prigradskom drumskom saobraćaju (prijevoz putnika i prtljaga od aerodroma do terminala i drugih usputnih stanica, kao i prijevoz za treća lica),
- usluge prihvata i otpreme aviona, putnika, prtljaga i robe za svoje potrebe i druge aviokompanije,
- usluge opravki i tehničkog održavanja zrakoplova za svoje potrebe i druge aviokompanije,
- špeditorske usluge,
- obučavanje kadrova za svoje potrebe i za treća lica,
- usluge privredne avijacije,
- ugostiteljske usluge,
- turističke usluge.

Javno preduzeće može vršiti i druge djelatnosti i komercijalne djelatnosti koje su u funkciji prometa putnika, roba i vršenja usluga u zračnom saobraćaju, te osnovati društvo sa ograničenom odgovornošću.

Član 10.

Javno preduzeće ne može promijeniti djelatnost iz člana 9. ove uredbe bez saglasnosti Vlade Republike Bosne i Hercegovine (u daljem tekstu: Vlada RBiH).

Član 11.

Osnivački kapital Javnog preduzeća formira se iz sredstava Republike i to:

- | | |
|--|-----------|
| 1. Dva hangara površine 2×3.000 m ² | |
| u vrijednosti | 2.000.000 |
| 2. Trajna obrtna sredstva u vrijednosti | 300.000 |
| 3. Avion Casa 212 u vrijednosti | 800.000 |

Svega 3.100.000

i osnivačkog uloga preduzeća "ENERGO-AIR" čiji je osnivač "ENERGOINVEST-HOLDING" Sarajevo, koji upisuje preduzeće "ENERGO-AIR":

1. Avion Cessna 550 u vrijednosti	2,000.000
2. Hangar površine 3.000 m ² u vrijednosti	1,000.000

Svega 3,000.000

Ukupan osnivački kapital javnog preduzeća iznosi 6,100.000.

Član 12.

Vlada RBiH daje saglasnost na statut i dugoročne, srednjoročne i godišnje planove i programe razvoja Javnog preduzeća.

Član 13.

Prava i obaveze između Republike kao osnivača i Javnog preduzeća koja nisu regulirana ovom uredbom, uredit će se ugovorom.

U ime Republike ugovor iz stava 1. ovog člana zaključit će ministar u Ministarstvu za transport i komunikacije.

Član 14.

Organi upravljanja Javnog preduzeća su Upravni odbor i Direktor.

Član 15.

Upravni odbor Javnog preduzeća ima pet članova. Vlada RBiH imenuje i razrješava članove Upravnog odbora.

Član 16.

Upravni odbor Javnog preduzeća, naročito:

- donosi statut,
- utvrđuje razvojnu i poslovnu politiku,
- donosi odluku o usvajanju planova razvoja i poslovanja,
- odlučuje o statusnim promjenama,
- odlučuje o osnivanju drugih preduzeća i imenuje Upravni odbor tih preduzeća,
- odlučuje o smanjenju i povećanju osnivačkog kapitala,
- odlučuje o raspodjeli dobiti,
- donosi investicione planove,
- odlučuje o kupovini dionica, odnosno udjela drugih preduzeća,
- usvaja izvještaje o poslovanju preduzeća i godišnji obračun,
- donosi akt o unutrašnjoj organizaciji i sistematizaciji,
- vrši i druge poslove utvrđene statutom.

Član 17.

Direktora Javnog preduzeća imenuje i razrješava Upravni odbor na osnovu javnog natječaja, uz saglasnost Vlade RBiH. Lice koje nije dobilo saglasnost za direktora od strane Vlade RBiH ne može na ponovnom natječaju biti izabran za direktora odnosno vršioca dužnosti.

Statutom Javnog preduzeća uredit će se način izbora i razrješavanja direktora.

Član 18.

Izuzetno, u slučaju ratnog stanja ili neposredne ratne opasnosti Vlada RBiH imenuje privremeni upravni odbor i direktora Javnog preduzeća.

Član 19.

Direktor Javnog preduzeća organizira i rukovodi procesom rada i vodi poslovanje preduzeća, zastupa i predstavlja preduzeće, predlaže osnove politike, program rada i plan razvoja i preduzima mjere za njihovo provođenje, podnosi izvještaje o poslovanju i godišnji obračun, postavlja i razrješava radnike sa posebnim ovlaštenjima, predlaže unutrašnju organizaciju preduzeća i vrši druge poslove i zadatke u skladu sa zakonom i statutom.

Član 20.

Statutom Javnog preduzeća utvrđuje se naročito: organizacija, ovlaštenja, prava, obaveze i odgovornosti lica zaduženih za tehničko-tehnološko osposobljavanje i funkcioniranje svih segmenata koji su u sastavu Javnog preduzeća, sigurnost zračne plovidbe kao i odnosi sa drugim avio prijevoznicima a

naročito zajednička ulaganja, izbor i nabavku letjelica, zajedničko marketinško, obrada tržišta, povezivanje u međunarodne sisteme i dr.

Član 21.

Na pitanja koja nisu regulirana ovom uredbom, a odnose se na organe upravljanja i rukovođenja Javnim preduzećem, njihova prava i dužnosti, vrste akata, koji se donose (statut, pravilnik o unutrašnjoj organizaciji i dr.), primjenjivat će se odredbe Uredbe sa zakonskom snagom o javnim preduzećima ("Službeni list RBiH", br. 4/92 i 21/92).

Član 22.

Radnici Javnog preduzeća ostvaruju svoja prava u skladu sa zakonom, statutom i kolektivnim ugovorom.

Član 23.

Javno preduzeće organizirat će se i početi sa radom najdalje u roku od 60 dana od dana stupanja na snagu ove uredbe.

Član 24.

Ova uredba služi kao osnivački akt na osnovu koje će se izvršiti upis Javnog preduzeća u sudski registar.

Član 25.

Ova uredba stupa na snagu danom objavljivanja u "Službenom listu RBiH".

PR broj 1650/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

229

Na osnovu člana 11. stav 2. Uredbe sa zakonskom snagom o osnivanju Agencije za međunarodnu saradnju u obnovi i razvoju Republike Bosne i Hercegovine ("Službeni list RBiH", broj 12/94), Predsjedništvo Republike Bosne i Hercegovine, donosi

ODLUKU

O IMENOVANJU ČLANOVA UPRAVNOG ODBORA
AGENCIJE ZA MEĐUNARODNU SARADNJU U
OBNOVI I RAZVOJU REPUBLIKE BOSNE I
HERCEGOVINE

I

Imenuju se članovi Upravnog odbora Agencije za međunarodnu saradnju u obnovi i razvoju Republike Bosne i Hercegovine, u sastavu:

- Alija Izetbegović, predsjednik
- dr. Haris Silajdžić, član
- Krešimir Zubak, član

II

Ovu odluku objaviti u "Službenom listu RBiH".

PR broj 02-111-387/94
5. maja 1994. godine
Sarajevo

Predsjednik
Predsjedništva RBiH,
Alija Izetbegović, s. r.

Ustavni sud Bosne i Hercegovine

Ustavni sud Bosne i Hercegovine, na osnovu člana 387. stav 1. tačka 1. Ustava Republike Bosne i Hercegovine i člana 72. tačka 5. Poslovnika Ustavnog suda Bosne i Hercegovine, na sjednici održanoj 28. aprila 1994. godine, donio je

ODLUKU

Odbija se prijedlog Privatnog preduzeća "PITS" Sarajevo za ocjenjivanje ustavnosti odredaba člana 11. do 16. Zakona o stavljanju lijekova u promet ("Službeni list SFRJ", broj 43/86 i "Službeni list RBiH", broj 8/93), koji je preuzet i primjenjuje se kao republički zakon Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini primjenjuju kao republički zakoni ("Službeni list RBiH", broj 2/92).

2,000.000
300.000
800.000

Svega 3,100.000

Ova odluka objavit će se u "Službenom listu RBiH".

O b r a z l o ž e n j e

Prijedlogom Privatnog preduzeća "PITS" Sarajevo, od 8. 2. 1994. godine, pokrenut je postupak za ocjenu ustavnosti odredaba člana 11. do 16. navedenog zakona, kojima su propisani posebni uslovi u pogledu stručne spremlje radnika pod čijim se nadzorom vrši proizvodnja, izrada, kontrola, smještaj, čuvanje i izdavanje lijekova u organizacijama udruženog rada koje stavljaju u promet lijekove (član 11.); u organizacijama koje izrađuju i stavljaju u promet magistralne i galenske pripravke (član 12.); u organizacijama koje obavljaju laboratorijska ispitivanja lijekova i pomoćnih lijekovitih sredstava radi stavljanja u promet (član 13.) i u organizacijama koje obavljaju klinička ispitivanja lijekova (član 14.). Odredbom člana 15. Zakona utvrđena je nadležnost za određivanje bližih uslova iz članova 11. 13. i 14. ovog zakona, a odredbom člana 16. propisana je obaveza navedenih organizacija da prilikom upisa u sudski registar kod nadležnog suda podnesu dokaze o tome da ispunjavaju uslove iz člana 11. do 15. ovog zakona i propisa donesenih na osnovu ovog zakona.

Predlagatelj je mišljenja da su osporenim odredbama zakona, a naročito članom 16, povrijeđene ustavne odredbe o ravnopravnosti svih oblika svojine, jer ovaj zakon poznaje samo društveni sektor, odnosno organizacije udruženog rada, a ne i privatni sektor, odnosno privatna preduzeća koja u momentu donošenja tog zakona nisu ni mogla postojati po pozitivnim propisima, odnosno smatra da se osporene odredbe ne odnose na privatna preduzeća.

Prema Ustavu Republike Bosne i Hercegovine zajamčeni su svi oblici svojine, koji su ravnopravni i uživaju zaštitu. Nosioci prava svojine su fizička i pravna lica. Slobodno je, u skladu sa Ustavom, obavljanje privredne i druge djelatnosti sredstvima u svim oblicima svojine (Amandman LXIII tačka 1.). Republika preko republičkih organa, u okviru svojih prava i dužnosti utvrđenih ustavom, uređuje, između ostalog, prava i obaveze organizacija udruženog rada, sada preduzeća i zdravstvenu zaštitu (član 304. tačka 5. i tačka 14.).

Zakonom o stavljanju lijekova u promet ("Službeni list SFRJ", broj 43/86 i "Službeni list RBiH", broj 8/93) kao i propisima donesenim za sprovođenje i izvršavanje ovog zakona, utvrđene su obaveze preduzeća koje se bave prometom lijekova da moraju ispunjavati propisane uslove u pogledu kadrova, prostorija i opreme, što su dužna dokazati prilikom upisa u registar kod nadležnog suda.

Zakon o preduzećima ("Službeni list SFRJ", br. 77/88, 40/89, 46/90 i 61/90) i Zakon o upisu u sudski registar ("Službeni list SFRJ", br. 13/83 i 17/90) koji su takode preuzeti u republičko zakonodavstvo, sadržavaju odredbe kojima je

propisana obaveza pribavljanja određenih saglasnosti utvrđenih posebnim propisima u postupku registracije preduzeća.

S obzirom na navedene ustavne i zakonske odredbe sva preduzeća imaju ista prava, obaveze i odgovornosti, bez obzira na oblik svojine. Republika je ovlaštena da utvrđuje zdravstvenu zaštitu i prava i obaveze preduzeća, što je i učinila preuzimajući određene savezne zakone i propise za sprovođenje i izvršavanje ovih zakona. Stoga, osporenim odredbama člana 11. do 16. Zakona, po ocjeni Ustavnog suda, preduzeća u privatnoj svojini nisu dovedena u neravnopravan položaj u odnosu na preduzeća u drugim oblicima svojine.

Odluka U broj 12/94 Prava i dužnosti predsjednika
28. aprila 1994. godine Ustavnog suda BiH, vrši sudija
Sarajevo prof. dr Ismet Dautbašić, s. r.

SLUŽBENE OBJAVE

PROGLAŠENJE UMRLIM

Osnovni sud I u Sarajevu poziva SOFTIĆ IBRAHIMA, sina Rašida i majke Ramize, rođene Rajkić, rođ. 16. 7. 1941. godine u Vogošći da se javi ovome sudu u roku od 30 dana od dana objavljivanja oglasa.

U isto vrijeme poziva se svaka osoba koja ma šta zna o životu ili smrti umrlog Softić Ibrahima, da se javi ovome sudu u istom roku.

Umrli Softić Ibrahim je navodno umro 25. 5. 1992. godine u Vogošći.

Po isteku roka oglašavanja biće proglašen umrlim Softić Ibrahim. (so-142/94)

SUDSKI OGLASI

Viši sud u Sarajevu, po sudiji Putica Jasminki kao predsjedniku vijeća, u pravnoj stvari tužitelja "YUGOSLAV-KOREAN CONSULTING AND TRADING CO. Inc. NEW YORK" protiv tuženog "MP YUCO NOVI SAD" radi 10.534.232,19 USA dolara, izdaje dana 18. 05. 1994. godine, sljedeći

O G L A S

Za privremenog zastupnika tuženom "MP YUCO NOVI SAD" postavlja se advokat Mitrović Jakša, iz Sarajeva, nastanjen na adresi ulica Kranjčevića broj 35 sa sjedištem kancelarije u Sarajevu u ulici Maršala Tita broj 52/I, koji će zastupati tuženog u postupku koji se vodi kod Višeg suda u Sarajevu, pod brojem PS-3529/91, sve dok se tuženi ili njegov punomoćnik ne pojave pred sudom. (so-139/94)

S A D R Ź A J

226	Odluka o prestanku mandata pojedinim poslanicima Skupštine Republike Bosne i Hercegovine	185
227	Uredba sa zakonskom snagom o osnivanju Agencije za međunarodnu saradnju u obnovi i razvoju Republike Bosne i Hercegovine	185
228	Uredba sa zakonskom snagom o osnivanju Javnog preduzeća "Air Bosnia"	186
229	Odluka o imenovanju članova Upravnog odbora Agencije za međunarodnu saradnju u obnovi i razvoju Republike Bosne i Hercegovine	187

USTAVNI SUD BOSNE I HERCEGOVINE

Odluka o odbijanju prijedloga Privatnog preduzeća "PITS" Sarajevo za ocjenjivanje ustavnosti odredaba člana 11. do 16. Zakona o stavljanju lijekova u promet ("Službeni list SFRJ", broj 43/86 i "Službeni list RBiH", broj 8/93), koji je preuzet i primjenjuje se kao republički zakon Uredbom sa zakonskom snagom o preuzimanju i primjenjivanju saveznih zaakona koji se u Bosni i Hercegovini primjenjuju kao republički zakoni ("Službeni list RBiH", broj 2/92)

187